

Informasjon om hjort-, elg- og rådyrjakta – Årdal 2023

Dette brevet vert sendt ut elektronisk til valda, i tillegg til at det vert lagt ut på heimesida til landbrukskontoret. Det er viktig at de som er valdansvarlege vidaresendar til alle grunneigarar og jegerar i valdet dykkar. Når alle får same informasjon, er det enklare å samarbeida:-) Om det er noko de lurer på, er det berre å ta kontakt!

Det er ingen endringar i signala frå sentrale styresmakter til kommunane kring Nordfjella og Hardangervidda i høve hjort/elg og skrantesjuka. Fokuset er å førebygge smittespreiing. Ved å ha låg tettleik av hjortevilt kring områda med påvist skrantesjuke håpar ein at sjansen for at hjort eller elg vert smitta, er liten. Heldigvis er det ikkje påvist smittsam skrantesjuke på korkje hjort eller elg i Noreg. Hjortebestanden i Årdal vert rekna som tett, og sentrale styresmakter oppmodar om framleis hard jakting for å redusera tettleiken.

I punkta under tar me for oss dei viktigaste tinga i høve årets jakt:

Kvote

Gjeldande bestandsplan for hjort er for perioden 2022-2024. Det er i bestandsplanen bestemt ei kvote på 296 fellingsløyve for hjort i 2023. I tillegg kan dei ubrukte løyva frå 2022 nyttast. Det var 139 løyve som ikkje vart brukt i fjor. Totalt er det då $296+139=435$ tilgjengelege fellingsløyve i 2023-sesongen. Hjorteløyve for 2024 kan i prinsippet også nyttast i år.

Alle fellingsløyva for hjort og rådyr er frie på kategori frå Årdal kommune sin side. Bestandsplanen som er laga i Årdal, omtalar kva som skal fellast på løyva. Fallingsløyva for elg er spesifisert på kjønn og alder frå Årdal kommune, men i bestandsplanen vert det likevel poengtatt at ein ønskjer felling av kalv og ungdyr.

Det er delt ut 14 fellingsløyve for elg og 29 fellingsløyve for rådyr. Sjå vedlegg for fordeling på dei ulike valda.

Jakttid

Kommunane kring Nordfjella og Hardangervidda har utvida jakttid på elg og hjort i jaktåra 2022/23-2024/25. Den formelle jakttida er 15.august-31. januar. Det er fredning frå jul til nyttår. Det er heller ikkje lov å nytta laus hund i periodane 15. aug.–31. aug. og 1. jan.–31. jan.

Jakttida for rådyr er delt:

- Vaksen rådyrbukk: 10. august-23. desember
- Anna rådyr: 25. september-23.desember.

CWD –prøvetaking

Vaksen hjort og elg skal prøvetakast av jegerane. Prøveresultata er svært viktige for vegen vidare. Info og utlevering av prøvemateriell skjer på jegermøte i august. Kasse med prøveutstyr står som vanleg på skytebane på Loi.

All generell informasjon om CWD er samla på: <https://www.hjortevilt.no/>

Kjeveinnsamling - fluor

Kjevar frå ungdyr og vaksne dyr av hjort, elg og rådyr skal hengjast på snora på skytebana på Loi. Hugs å merka med utfylt merkelapp. For ungdyr er det ikkje naudsynt å ta CWD-prøve, så då kan de nyta ein kjevelapp frå kassa på Loi.

Jegermøte

Me planlegg å ha jegermøte i Årdal før jaktstart i august. Meir info om tid og stad kjem seinare.

Helikopter

Statens naturoppsyn tilbyr IKKJE helikoptertransport av slakt denne sesongen. Eventuell utflyging må organiserast privat.

Sal av slakt

Når det skal fellast mykje hjort, kan det kanskje vera trøng for å selja unna eit slakt eller to. Haugen gardsmat i Flåm v/Odd Ohnstad kjøper slakt. Sjå
<https://www.haugengardsmat.no/jegerinfo>

Telefonnummeret til Odd er 915 39026.

Sett-og-skutt

All jakting skal registrerast på Hjorteviltregisteret. Det er viktig også å registrera jaktdagane utan felling eller observerte dyr. Registreringane gjerast anten ved å logga deg inn på www.hjorteviltregister.no eller ved å lasta ned settogskutt-appen. Det er viktig at jegerane registrerer jaktinga si fortløpende, då har me oversikt over korleis fellinga ligg an underveg i jakta.

Prøvesvaret finn de på hjorteviltregisteret under «Helse»-fana i Hjorteviltregisteret. I 2018 vart det gjort nokre endringar på korleis jegerane skulle registrera jaktinga si på settogskutt. I korte trekk var endringa den at alle observerte dyr skulle registrerast, uavhengig av om dyret med sikkerheit var sett fleire gonger/av andre. Me trur ikkje mange fekk med seg denne endringa, fordi det ikkje var godt marknadsført. I tida no er sett-hjort-registreringane viktigare enn nokon gong fordi me på den måten kan følgja med på endringane i bestanden opp i mot målet om reduksjon. Ei endring i måten å føra på er difor uheldig fordi det vert vanskelegare å samanlikna tala mellom åra. Difor har me beslutta at me IKKJE VIL FØLGJA endringa som det er lagt opp til i føring av sett-hjort. Alle jegerar i Årdal skal altså føra sett-hjort som før, og ikkje ta hensyn til endra instruks! Ergo, registrer sett-hjort som «vanleg»!

Human jakt

Sjølv om det er ønskjeleg med høgt fellingsresultat, er det viktig at de tenkjer sikkerheit og human jakt når de er ute. Skyt kalven før kolla. Hugs plikten til å ha tilgang på ettersøkshund –og bruk hunden når uhellet er ute! Her har me ein del å gå på!

Samarbeid

Alle hjortevalda i Årdal er med i det som vert kalla «Årdal bestandsplanområde for hjort». Då er det opna for at ein kan flytta løyve mellom valda, og mellom åra i bestandsplanperioden. Ordninga gjeld kun for hjort (altså ikkje elg og rådyr). Flytting av løyve er brukt i ein viss utstrekning i Årdal, men det er mogleg/ønskjeleg å nytta dette endå meir. For å flytta løyve mellom åra i planperioden trengs det ingen avtale. Alle fellingsane skal meldast inn i fellingsrapporten det året dei er felt. Det vil seia at det er heilt ok at eit vald har meir enn 100% felling eit år. For å flytta løyve mellom vald som er medlem i bestandplanområdet, må valda ha ei skriftleg avtale om samjakt. Vald i Utladalen kan kunn flytta løyva sine innad i Utladalen driftsplanområde. Ta kontakt om du ønskjer eit ferdig formular på løyveflytting.

Det valdet som får fellingsløyvet tildelt, skal rapportera resultatet, uavhengig av om løyve er nytta på eit anna vald. På settogskutt registrerer jegerane fellinga på det valdet som dyret vart jakta på. Fellingsavgifta vert fakturert valdet som fekk løyvet. Det som truleg vil vera avgrensande for jakttaket til hausten er jegeranes tilgjengelege tid til å jakta. Dei valda som «føler seg ferdig» med å jakta i løpet av hausten og som har mykje dyr i terrenget, bør vurdera om dei kan sleppa fleire jegerar inn i terrenget. Dette kan gjerast anten ved at jegerar har med «eigne fellingsløyve» eller at fleire jegerar kan koma inn og jakta på dei løyva som er gitt det aktuelle valdet. Dei merka hjortane fortel oss at dyra nyttar mange vald i løpet av året. Dei dyra som ein kanskje opplever som «eigne dyr», flytter seg ofta mykje, både i løpet av døgeret og sesongen.

Fellingsavgift

Fellingsavgift:	2023
Hjort $\geq 1,5$ år	450
Hjort kalv	0
Elg $\geq 1,5$ år	580
Elg kalv	0

Rapportering

Frist for rapportering til kommunen er 14 dagar etter endt jakttid. Som i fjar, og truleg i all overskueleg framtid, skal valdansvarleg gjera dette i hjorteviltregisteret. Me tek sikte på litt meir info om dette når det nærmar seg.

Skitt jakt!